



*Kamis, 01 September 2022*  
**Ogen: Esekiel 47:13-23**



*"Dat Bagin"*



**K**egeluhén i bas doni megati iperhadapkan ku bas masalah pembagin; subuk pembagin bas pendahin, pembagin pangan, pembagin erta tading-tadingen orangtua bage pe pembagin penghasilen arah keuntungan si idat i bas sada-sada usaha. Mehuli ras langna pembagin e tentu menentukan ku bas hubungan kinerja bage pe perkade-kaden selanjutna. Adina sikap pembagin e tentu maba kiniulin ras kejuah-juahen man kalak si mbagi bage pe man si milih tapi adina kurang sikap pembagin e tentu banci nadingken ulih si kurang ulina erkitelen lit pihak si merasa irugiken.

Erlajar kita arah bahan paksa tenengta wari enda kerna pembagin tanéh rikut pe ras balengna si payo dinging adil, si ilakoken Tuhan Dibata man Bangsa Israel kenca bangsa e ndarat i daerah pembuangan nari mulih ku tanéh perpadanen si ibereken Tuhan. Tuhan nehken padan man bangsaNa guna mbagiken tanéh rikut pe ras baleng-balengna. Tuhan mabai bangsa e lako nggejapken maka kerna kerina si nggo ilakoken Tuhan nandangi kegeluhén bangsa Israel arus maka ielaken bangsa e ka man keluarga, suku bage pe kalak sideban. Hal si menarik guna jadi perenungen maka i bas ayat 22b, ituliskan "*Bangsa si deban si ringan i tengah-tengahndu janah anak-anakna si tubuh i bas negeri e, arus dat bagin tupung tanéh e ibagi-bagikenndu. Man bana pe arus bali ibahan ras man kalak Israel*". Arah kai si ikataken Tuhan Dibata enda, iajari dinging ipersingeti kita, maka labo terjeng dirinta, keluarganta ngenca siukurken gelah kita mejuah-juah dinging dat pembagin tapi pe arus ngukurken kerna kiniulin ras kejuah-juahen kalak si tading ras kita entah pe i bas kuta/kota inganta tading. Kalimat bangsa si deban si ringan i tengah-tengahndu encidahken maka kalak si labo lit iketen/hubungan kekeluargaan ras kita pe arus dat bagin si payo. Sura-sura Dibata maka arus si ngelakoken keadilan, gelah kerina kalak si ndeher ras ia datken kejuah-juahen.